

- *1. وزیر اعظم نریندرمو دی پہلک لوک سبھا مانہ قومی گیت وندے ماترم لکھیا جان غا 150 بہرا مکمل ہون ور لوک سبھا مانہ بحث غو آغاز کریں گا۔
- *2. وزیر دفاع راجناتھ سنگھ نے اج جموں کشمیر غا 22 اہم پروجیکٹاں غو ویڈیو کا نفرسنگ غے ذریعے افتتاح کیو، ایل جی منوج سبھا ے اس افتتاح ور شکریو ادا کیو ہے ۔
- *3. لیفٹنٹ گورنر منوج سنہا نے مسلح افواج گا یوم پرچم ور شکریو ادا کرتاں واں لوکاں ور کھلا دل سنگ مالی تعاون کرن غی ضرورت ور زور پایو۔
- *4. جے کے پی ایس سی ے مشترکہ مقابلاجاتی امتحان اج طے شدہ تاریخ ور امتحان رد کرن تے عمر غی حد مانہ رعایت غا معاملن ور شروع ہوا تنازعہ غے باوجود منعقد کرا دتا ہیں۔
- *5. تے وادی کشمیر مانہ درجہ حرارت مانہ آئی گراوٹ غی وجہ نال ٹھنڈ مانہ خاصو بابدو درج کیو گیو ہے جت پہلگام مانہ سب تیں کھٹ درجہ حرارت منفی 4.3 ڈگری سلسیس ریکارڈ کیو گیو جد کہ جموں مانہ درجہ حرارت نسبتاً بہتر ریکارڈ کیو گیو ہے ۔

خبران غی تفصیل نال پہلاں باغ علی طاہر۔

Vande Matram Discussion

قومی ترانہ " وندے ماترم" لکھیا جان غا 150 بہرا مکمل ہون ور پہلک لوک سبھا مانہ اک خصوصی مباحثو شروع ہو رہیو ہے ۔ سرکاری ذریعے نے جانکاری دیتاں واں دسیو ہے جے وزیر اعظم نریندرمو دی لوک سبھا مانہ بحث غی شروعات کریں گا۔ گذشتہ ہفتے میڈیا ناہہ جانکاری دیتاں وا پارلیمانی امور غا وزیر کرن رجیو نے دسیو تھو جے مکمل بحث غو آغاز دوپہر 12 بجے ویگو۔ انہاں نے دسیو تھو جے لوک سبھا غا سپیکر اوم برلا غی صدارت مانہ ہونی کل جماعتی میٹنگ مانہ یوہ فیصلو کیو گیو ہے جے " وندے ماترم" ور بحث 8 دسمبر ناہہ جد کہ چناوی سڈھاراں غا معاملہ ور 9 دسمبر ناہہ بحث کی جائے گی۔

PM India Growth

وزیر اعظم نریندرمو دی نے کہیو ہے جے للکارا تے غیر یقینی مانہ الجھی وی دُنیا مانہ قوم اپنا آپ مانہ اک اچو مقام رکھے۔ عالمی سطح ور بھارت غا کردار غو ذکر کرتاں واں وزیر اعظم نے کہیو جے بھارت اس ویلے دُنیا مانہ بہتر اقتصادی بڑھو تری تے کھٹ مہنگائی غا معیار وراک نمونہ غی حثیت رکھے۔ کل نوی دہلی مانہ اک تقریب سنگ خطاب کرتاواں جناب مو دی نے دسیو جے موجودہ مالی سال غی دوجی چوتھائی غے دوران 8 فیصدی مجموعی کہریلو پیداوار نال ملک غی بدھتی ترقی غو پتو چلے۔ انہاں نے کہیو جے ایسا وقت مانہ جد لوگ اقتصادی پستی گل کر رہیا ہیں ، بھارت اپنی اقتصادی ترقی غو ذکر کر رہیو ہے ۔ اس با رے گل کرتاں واں وزیر اعظم نے کہیو۔ بانٹ۔۔۔

BRO Projects

وزیر دفاع راجناتھ سنگھ نے آج جموں کشمیر مانہ سرحدی سڑک تنظیم غا 22 اہم بنیادی ڈھانچہ گا منصوبہ ور مبنی پروجیکٹا غو ویڈیو کا نفرنسنگ غے ذریعے افتتاح کیو۔ اپنا خطاب غے دوران وزیر دفاع نے کہیو۔۔ بانٹ۔۔ لیفٹنٹ گورنر منوج سنہا نے ا پروجیکٹا غا افتتاح کیا جان ور وزیر اعظم نریدرمودی نے راجناتھ سنگھ غو شکریو ادا کیو۔ سماجی میڈیا غی اک پوسٹ مانہ لیفٹنٹ گورنر نے کہیو جے قومی سلامتی غی اہمیت غا ترقیاتی ڈھانچہ غا یہ پروجیکٹ بیکن تے سمپرک غے تحت مشکل ترین علاقہ مانہ مکمل کیا گیا ہیں ، جن غی مدد سگ دور دراز علاقہ توڑی فوج غی رسانی پورا سال غے دوران ممکن ہو سکے گی۔ اسے دوران ریاسی ماہور سڑک وی ان پروجیکٹا مانہ شامل ہے، جن غو افتتاح کیو گیو۔ ویڈیو کا نفرنسنگ غے ذریعے کیا گیا اس افتتاح مانہ ممبر پارلیمنٹ جگل کشور نے رلوریاسی تیں شرکت کی۔ انہاں نے اخباری نمائندان سنگ گل کرتانواں کہیو۔۔ بانٹ۔۔

JK Govt Award

جموں کشمیر سرکار نے آئندہ سال یوم جمہوریہ غا موقع ور جے اینڈ کے ایوارڈ دتا جان غی خاطر نامزدگیں منگی ہیں۔ محکمہ انتظام عامہ غی طرفوں جاری کی گئی اک نوٹیفکیشن غے مطابق یہ ایوارڈ بہا دری، ادب، پر فارمننگ آرٹس، فن تے دستکاری ، سماجی اصلاحات، عوامی خدمات، زندگی پھر غی کارکردگی غی حصولیابی، کھیڈاں، میڈیا، ماحولیات تے صنعتی کاروبار مانہ نمایاں خدمات غا اعتراف مانہ دتا جائیں گا۔ سماجی ، کھیڈاں غا اداراں ، غیر سرکاری تنظیمان ، یونیورسٹیاں ، جموں کشمیر اکیڈمی برائے فن، ثقافت تے لسانیات اور انتظامی سیکریٹریاں تیں نامزدگی طلب کی گئی ہیں۔ اس سلسلہ مانہ اندراج غی آخری تاریخ 15 دسمبر 2025 ہے ۔

مزید خبران نال عبدالمجیدور اُس تیں پہلاں یوہ پیغام۔(یہ خبر تم آکاشوانی جموں تیں سن رہیا ہیں، تے یہ خبر مہاری ویب سائٹ نیوز آن آنیر ڈاٹ گوو ڈاٹ ان ور وی دستیاب ہیں، اس تیں یہ (خبر مہاری موبائل ایپ تے ڈی ٹی ایچ ور وی دستیاب ہیں

LG Flag Day

لیفٹنٹ گورنر منوج سنہا نے آج مسلح افواج غا یوم پرچم غا موقع ور مسلح افواج غا اہل کاران تے شہیداں غی ملک واسطے دتی گئی عظیم قربانیاں تے مخلص خدمات واسطے ان غو دل تیں شکریہ غو اظہار کیو ہے۔ اک سوشل میڈیا پوسٹ مانہ ایل جی نے تمام شہریاں ور زور پایو ہے جے وے مسلح افواج غا یوم پرچم فنڈ مانہ فراخ دلی نال نعاون کریں۔ کیونجے یاہ فنڈ مسلح افواج غا اہل کاران تے ان غا کُنباں غی بھلانی بہتری تے وقار مانہ معاون ہے۔ ایل جی نے مزید کہیو ہے جے یوہ تیہاڑو مسلح افواج غا بہادر جوانان تے بہادر کاسریاں غا عزم تے حوصلہ غی یاد کراوے۔

LG CM Condolences

لیفٹنٹ گورنر منوج سنہا نے گواہ مانہہ اگ زنی غی واردات غے دوران جانی نقصان ور ڈونگا دُکھ غو اظہار کیو ہے۔ اُنہاں نے اِس واقع مانہہ زخمی ہوا افراد غی تولاں صحت یابی غی دُعا وی کی ہے۔ اِک سماجی میڈیا پوسٹ مانہہ ایل جی نے متاثرہ کُنباں نال تعزیت غو اظہار کیو تے کہیو جے رب اُنہاں نانہہ اِس مشکل وقت مانہہ یوہ صدمو سہن غی صلاحیت دے۔ وزیر اعلیٰ عمر عبداللہ نے وی اگ زنی غی اِس واردات ور گہرا افسوس غو اظہار کیو ہے، تے متاثرہ خانداناں نال تعزیت کی ہے تے زخمیاں غی تولا صحت یابی غی دُعا کی ہے۔

CCE Exam

جموں کشمیر مانہہ اِج پی ایس سی یعنی پبلک سروس کمیشن غی طرفوں مقرر کیا گیا امتحانی مرکز اِن مانہہ سانجھا مقابلاتی امتحان مانہہ ہزارا اُمید وارا نے حصولیو۔ اِس امتحان تین پہلاں اِس امتحان واسطے عمر مانہہ رعایت، پروازا غی مسوخی تے اِس نانہہ موخر کرن غی ماگ سامنے آئی تھی۔ ور اِس نانہہ نظر انداز کرتاں واں پی ایس سی نے یوہ امتحان منعقد کیو۔ یوہ امتحان مقررہ وقت 10 بجے شروع ہونو۔ اِس امتحان غا سلسلہ مانہہ منتخب سرکار، سیا سی پارٹیاں تے امتحان مانہہ حصولیو اِلا اُمیدوار اِس امتحان نانہہ موخر کرن غی مانگ کر رہیا تھا۔ تے لوک بھون نے زور دیتو جے یوہ امتحان تاخیر نہیں ہونی چاہیے۔

Rajouri Half Marathon

صحت تے تندرستی سماجی مانہہ اتحات تے منشیات غے خلاف بیداری نانہہ بابدو دی واسطے راجوری پولیس نے راجوری ہاف میراتھان 2025 غو انعقاد کیو۔ ہر قدم ایکتا کے لئے، ہر میل نشے کے خلاف غا عنوان ال اِس دوڑ مانہہ بھارت پھر تین کھلاڑیاں، نوجواناں، بزرگ شہریاں، طالب علماں تے کھیڈاں غو شوق رکھن آلاں نے حصولیو۔ اِس دوڑ مانہہ 3 زمرہ شامل تھا، جس مانہہ 21 کلو میٹر غی ہاف میراتھان، 10 کلو میٹر غی مقابلاجاتی دوڑ تے 5 کلو میٹر غی تفریح واسطے دوڑ شامل ہیں۔ آکاشوانی نیوز نال گل کرتاواں ڈی سی راجوری ابھشیک شرمانے کہیو۔ بانٹ۔

Weather

وادی کشمیر مانہہ سخت سردی پے رہی ہے بہت ساری جگہیں درجہ حرارت صفر ڈگری سلیسیس تی تلے درج کیو گیو ہے۔ پہلگام مانہہ سب تین کھٹ درجہ حرارت منفی 4.3 سلیسیس درج کیو گیو۔ بشمول سرینگر کھٹ وکھٹ درجہ حرارت گذشتہ راتاں غی سبت بہتر رہیو ہے تے اس طرح اُت کھٹ وکھٹ درجہ حرارت منفی 0.9 ڈگری سلیسیس رہیو۔ اواں جموں خطہ مانہہ درجہ حرارت معتدل رہیو، جموں مانہہ کھٹ وکھٹ درجہ حرارت 8.3 ڈگری سلیسیس کٹڑہ مانہہ 9.2 ڈگری، بٹوت مانہہ 6.2، بھدرواہ مانہہ 2 ڈگری، بانہال مانہہ 1.5 ڈگری، اُدھم پور مانہہ 3.6 ڈگری سلیسیس جد کہ رام بن مانہہ 4.9 ڈگری تے ڈوڈہ مانہہ درجہ حرارت 6.7 ڈگری سلیسیس درج کیو گیو۔
